



REPÚBLICA DEMOCRÁTICA DE TIMOR-LESTE
MINISTÉRIO DA JUSTIÇA

**RELATORIU PARTISIPANTE SORUMUTU "ASEAN INTERGOVERNMENTAL
COMMISSION ON HUMAN RIGHTS (AICHR) REPRESENTATIVES
ASSISTANTS MEETING" IHA JAKARTA - INDONESIA**

I. Introdusaun

Komisaun - ASEAN Intergovernmental ba Direitus Umanus (AICHR), nudar komisaun ida husi organizasaun ASEAN nian, ne'ebe mak ofisializa/hariin husi lideransa ASEAN nian iha loron 23 Outubru 2009, liu husi simeria ASEAN ba dala 15 iha Cha-Am Hua Hin - Tailandia, nune'e reforsa liu tan ho pormulgasaun ba deklarasaun Direitus Umanus (AHRD) ne'ebe adoptada iha fulan novembru 2012. Adopsaun refere assina husi lideransa ASEAN nian. Kriasaun AICHR hatudu empennu ASEAN hodi buka estratejia antes, hodi reforsa kooperasaun rejional iha materia direitu umanus.

Membru AICHR mai husi representante kada nasaun membru, ne'ebe mak indika husi ida idak nia governu rasik, inklui Timor Leste ne'ebe mak marka representante nudar observador. Desizaun sira ne'ebe mak foti iha sorumutu AICHR bazeia ba konsulta no iha konsensu.

a. Representante AICHR Timor Leste

Timor Leste partisipa iha sorumutu AICHR ne'e hahu husi 2023, iha tempu ne'eba husi PDHJ mak sai nudar representativu, tamba PDHJ hetan konvite ba partisipasaun. Atu labele husik bandeira no kadeira Timor Leste nian mamuk iha sorumutu AICHR ne'e, maske hanesan intituisaun independente no kontrolu maibe PDHJ nafatin partisipa hodi priense Timor Leste nia fatin.

b. Nomeiasaun Representativu Foun

Atu halo politika no jestaun diplomasia ba rai liur, Timor Leste liu husi Ministeriu Negosius Estrangeiru no Kooperasaun, iha nonu governu establese pasta Vice Ministra

ba Assuntu ASEAN hodi identifika hikas atividade sorumutu iha ASEAN nian, katak sorumutu AICHR nudar sorumutu **Intergovernmental**. Tamba ne'e mak muda hikas representante Timor Leste nian, tenki mai husi orgaun governmental liu liu Ministeriu Justisa, ne'ebe mak iha mos diresaun Direitus Umanus no Sidadania, haknar aan iha Diresaun Jeral Politika Justisa nia okos.

Tamba ne'e liu husi karta Vice Ministra Asuntu ASEAN ba ASEAN Intergovernmental Commission on Human Rights (AICHR) datada 8 Maiu 2025, hodi indika katak representante husi Timor Leste mai husi Ministeriu Justisa Timor Leste, liu husi Diresaun Jeral Politika Justisa.

II. Objetivu

AICHR (ASEAN Intergovernmental Commission on Human Rights), komisaun ida hola parte ba iha korpu ASEAN nian, ne'ebe mak hare'e liu ba iha assuntu direitus umanus. Hanesan ita hatene katak organizasaun ASEAN iha ninia sorumutu kada tinan rihun ida resin (+1000) inklui sorumutu ba AICHR ne'e rasik.

Sorumutu intergovernmental ba direitu umanus akumula nasaun 10 (sanulu), aumenta tan ho Timor Leste ba hanesan observasaun. Sorumutu ne'e koalia liu ba direitus umanus iha mundu no ninia impaktu mai to'o iha ASEAN nian, hanoin hamutuk atu halo balansu ba direitus umanus entre nasaun sira iha ASEAN nia laran, katak laiha ema ida hela iha kotuk.

Sorumutu refere deskuti liu liu kona ba progresu implementasaun programa no atividade prioridade AICHR nian, ne'ebe mak akumula tematika oin oin, hanesan *saude mental iha era digital, direitu ba labarik no ba ema ho deficiencia, bisnis no direitus ema nian no meu ambiente, direitus ema nian ho polisia, relasaun entre konflitu no direitu umanus, direitu ema nian iha tasi, iniciativa anti trafiku umanu nomos diskusaun joven ASEAN nian*.

Sorumutu ne'e konkorda ho proposta deklarasaun ASEAN nian, kona ba Direitu ba ambiente seguru, limpu, saudavel hodi submisaun ba reuniaun Ministerio Negosiu Estranheiru husi ASEAN.

III. Partisipante Timor Leste no Durasau

Responde ba konvite ne'ebe haruka husi MNEC mai iha Diresaun Jeral Politika no Justisa-DJPJ nomos ba iha Provedoria Direitus Umanus no Justisa - PDHJ. Hanesan mensiona introdusaun iha sorumutu AICHR.

Iha sorumutu AICHR ba dala 41 ne'e, MNEC liu husi Vice Ministra Asuntu ASEAN nian, halo mudansa ba representavu husi Timor Leste. Antes ne'e husi PDHJ mak nudar representativu Timor Leste nian, maibe ba sorumutu ida ne'e hodi ba oin Ministeriu Justisa (DJPJ) mak hola knar ba representativu nian, nune'e participante sira mak tuir sorumutu ne'e hanesan:

1. Honorio Aureliano Soares Magalhães, Diretor Jeral-PJ (MJ), nudar Representativu TL
2. Sidonio Martins, DN-Assuntos Política no Seguransa (MNEC), nudar Alternate TL
3. Elvio Marciano D. Soriano, Xefe Dep. Direitus Umanus no P.A (DNDHC-MJ), nudar assistente
4. Olga V. Siqueira, Tek. Especializada Relasaun Publika iha PDHJ, nudar assistente

Sorumutu AICHR ba dala 41º ne'e, lao hamutuk loron lima (5) sura husi loron 11 to'o 16 Maiu 2025 (domingu to'o sesta) :

- Loron dahulu (domingu 11 Maiu 2025): sorumutu ne'e halao/partisipa entre assistente sira deit, ho ojetivu halo diskusaun preparasaun ba ajenda no material sira ne'ebe atu deskuti iha sorumutu principal nian iha loron ruir mai.
- Loron daruak to'o ramata (12 - 16 Maiu 2025) ajenda principal, partisipa delegasaun hotu (Representativu, Alternate no assistente) husi membru ASEAN inklui Timor Leste sai nudar observador.
- **Funsaun:**
 - a. **Representativu:** nudar pessoal ne'ebe mak lidera ka sai nudar representa nasaun Timor Leste ba iha enkontru AICHR nian. (tu'ur iha banku oin ho bandeira nasional);
 - b. **Alternate:** nudar pessoal daruak ba Representavu, bele apoiu malu (tu'ur iha Representativu nia sorin karuk ou iha Representativu nia kotuk depende ba fatin ne'ebe prepara);
 - c. **Assistente:** nudar apoiu tekniku, administrativu no operacional (tu'ur iha Representativu ho Alternate nia kotuk);

IV. Orsamentu

Sorumutu AICHR ne'e nudar parte ida husi sorumutu hotu ba programa ASEAN nian, nune'e maske hanesan observador deit, Timor Leste iha obligasaun atu atende sorumutu hirak ne'e no labele husik Bandeira nasional Timor Leste nian mamuk, nune'e atu hatudu ba nasaun membru sira seluk, Timor Leste nia seriedade no komitmentu hakarak sai membru permanente ba ASEAN.

Atu atinji Timor Leste nia komitmentu mak mensiona iha leten estadu Timor Leste liu husi MNEC-Vice Ministra Asuntu ASEAN tau osan hodi atende ba atividade ASEAN

nian, nune'e orsamentu ne'ebe mak utiliza ba sorumutu AICHR nian mai husi OGE 2025 ne'ebe mak kolokadu iha MNEC.

Orsamentu refere akumulada item ba Billete Aviaun nomos Perdiem.

V. Metodu Sorumutu

Hanesan sorumutu sira hotu em jeral, sorumutu ba AICHR-ASEAN ne'e, halao regular kada tinan ho ninia presidencia husi kada nasaun membru, iha tinan 2025 ne'e presidencia ba ASEAN nian mak Malaysia, nune'e sorumutu hotu iha kada seitor, Malaysia mak lidera.

- Sorumutu hotu lidera husi presidente ba meja ka Chair person;
- Ajenda ne'ebe mak iha, deskute antes tiha ona no tau iha formatu feitu para diskusaun
- Resultadu sorumutu tau hamutuk ho naran Summary Record
- Sistema diskusaun ba desijaun liu husi konsensu
- Sorumutu Interface nomos Online
- Dalen ne'ebe mak uja: Ingles

VI. Konkluziun

Partisipasaun ba iha sorumutu kada seitor importante tebes ba iha Estadu Timor Leste, atu nafatin hatudu vontade, seriedade no komitmentu Timor Leste atu adere ba ASEAN.

Maske hanesan observador deit, maibe prezensa Timor Leste iha sorumutu sira ASEAN nian, nudar faze aprendizazen no pontu importante ba membru ASEAN hotu atu hare no avalia Timor Leste hodi bele fo'o pontu pozitivu ba iha prosesu adezaun ba membru plenu ASEAN nian.

Tamba ne'e ho kondisaun saida deit Timor Leste tenki hakaas an participa iha reuniaun hotu hotu ne'ebe mak realiza husi ASEAN, atu bele aprende no prepara aan iha future Timor Leste Preparadu.

VII. Rekomendasaun

Ho knaar ne'ebe mak agora dadauk Ministeriu Justisa, liu husi Diresaun Jeral Politika Justisa ho DNDHC asumi hanesan Representativu nomos Assistente, iha hanoin katak, atu atendementu ba sorumutu AICHR ne'e ita kumpri tuir kalendariu mak planeadu ona, nune'e Timor Leste la bele lakon ninia oin iha ASEAN.

Tamba ne'e ami rekomenda:

1. Presiza asegura osan ba viajen estranjeiru, atu nune'e ita nia partisipasaun iha sorumutu AICHR, la bele hetan difikuldade
2. Presiza kriaun formasaun ba lian Ingles, nune'e ita hotu preparadu ba ASEAN

Mak ne'e deit ami nia relatorio hodi bele hetan konsiderasaun. Obrigadu.

Relata husi:

1. Honorio A. Soares Magalhães, Diretor Jeral-PJ (MJ), nudar Representativu TL 

2. Elvio M. D. Soriano, Xefe Dep. Direitus Umanus no P.A (DNDHC-MJ), nudar asistente 